



Xueves, 3 de setiembre del 2020

## El Gobiernu d'Asturies va dedicar esti cursu más de 40 millones a reforzar Educación pa facer frente a la covid

- L'Executivu autoriza 21 millones pa la contratación de 565 docentes destinaos a los centros públicos
- La llinia d'ayudes pa ONG con cargu al recuadru solidariu del IRPF aumenta un millón en comparanza col 2019 y algama los 5,5
- El Principáu intensifica l'apueste pola movilidad sostenible y incentiva con hasta 5.500 euros la compra de coches eléctricos
- L'Executivu va invertir 7,5 millones en trés obres de saniamientu y depuración d'agua en Llanes, Siero y Uviéu

El Conseyu de Gobiernu autorizó güei un gastu de 16.160.716,14 euros pal nomamientu de personal temporal docente pa facer frente a les necesidaes derivaes de la covid-19 en centros públicos. A esti importe hai qu'añedir 5.042.143,44 euros en conceptu de costos sociales, lo que xube'l montu a 21.202.859,58 euros. En total, l'Executivu va dedicar esti cursu más de 40 millones a reforzar Educación pa facer frente a la covid.

Los fondos que recibieron lluz verde pol Conseyu de Gobiernu van dexar contratar a 565 docentes nos centros públicos n'Educación Infantil y en tolos cursos de Primaria, amás de primeru y segundu de Secundaria y Educación Especial. Toes estes contrataciones formen parte del refuerzu extraordinariu anunciáu pol Gobiernu d'Asturies dientro de les polítiques entamaes pa encarar la pandemia.

Na convocatoria vinientes de personal interino, que la consejería va adelantar al vienres 11 de setiembre inclúyese la provisión de places n'Infantil y Primaria xeneraes de resultes del aumentu de grupos. Na convocatoria del día 22 van incluyise, ente otres, les places pa los grupos xeneraos en 1.º y 2.º d'Educación Secundaria.

L'esfuerciu económicu va ser, sicasí, más altu que l'autorizáu esta tarde pol Executivu. Pa realizar les 865 contrataciones extraordinaries previstes -565 pa los centros públicos y lo demás pa los concertaos- van



disponese más de 30 millones. A esa cantidá hai qu'añedir otre, rellacionaes colos costos sociales, la compra de material de protección, l'adeacuación d'espacios, etcétera. El resultáu va superar los 40 millones. El total sobrepasa notablemente les ayudes estatales previstes (32,5 millones).

L'oxetivu del Gobiernu del Principáu ye'l derechu a la educación cola mayor seguridad sanitaria posible. Pa eso, van estremase les rutines d'hixene y prevención en colexos y institutos p'aforrar riesgos. Alumnáu, profesoráu y families van tener a la so disposición formación y información, porque la concienciación, colaboración y responsabilidá de toes y toos va ser esencial.

### **Sofitu a la iniciativa social**

El Principáu va dedicar 5,5 millones a la llinia d'ayudes pa les organizaciones non gubernamentales (ONG) d'iniciativa social, un presupuestu que supón un aumentu de más d'un millón en comparanza col añu pasáu. La convocatoria, financiada con cargu al 0,7 % del recuadru solidariu del Impuestu sobre la Renta de les Persones Físiques (IRPF), va publicase la selmana que vien. Esta iniciativa refuerza les midíes específiques destinaes a estes entidaes que cada añu programa la Consejería de Derechos Sociales y Bienestar.

En concreto, el Conseyu de Gobiernu autorizó una partida inicial de 4.466.519,00 euros pa financiar la convocatoria de subvenciones empobinaes a la realización de programes d'interés xeneral p'Asturies con cargu a l'asignación tributaria del Impuestu sobre la Renta de les Persones Físiques. Sicasí, la cantidá final va algamar los 5.503.659,94 euros, tal como se recueye nel alcuerdu del Conseyu Territorial de Servicios Sociales y del Sistema pa l'Autonomía y Atención a la Dependencia celebráu en xunu.

La convocatoria del 2019 cuntó con 4.466.518,26 euros, colos que se financiaron 438 proyectos de 147 entidaes, qu'anguaño se tán desenvolviendo.

Dende'l 2017, les autonomíes xestionen el 80 % de los fondos de la "x solidaria" -qu'enantes alministraba namás l'Estáu- en cumplimientu d'una sentencia del Tribunal Constitucional que valoró parcialmente la inconstitucionalidá del modelu anterior.

Estes ayudes, que se financien coles aportaciones de los contribuyentes que marquen el recuadru de fines sociales na so declaración de la renta, van dirixíes a oenugués que desenvuelven programes de sofitu a la infancia, families, mocedá, colectivos de mayores, persones con discapacidá o en situación de vulnerabilidá y riesgu d'esclusión social. En

concreto, la convocatoria subvenciona midíes d'atención integral, respaldu educativu o asistencia pal inxertamientu llaboral.

### **Fomentu de la movilidad eficiente y sostenible**

El Gobiernu dio lluz verde a una partida de 2.068.929 euros cola que se va financiar la convocatoria del Plan Moves II, destináu a incentivar la compra de vehículos alternativos por empreses y particulares, la instalación d'infraestructures de recarga y la promoción de sistemas d'empréstanu de bicicletas eléctriques. El documentu tamién incluye ayudes al desenvolvimientu de planes de movilidad escontra los centros de trabayu y midíes de sofitu a los conceyos na implantación de midíes p'adaptar la movilidad urbana al escenariu nuevu deriváu de la covid-19.

La segunda edición d'esti programa, que'l so financiamientu cuerre al cargu de la Alministración central y ye xestionada poles comunidaes autónomes, va tar en vigor anguaño y l'añu que vien, y dobla'l repartu de la primer convocatoria. Esti aumentu va d'alcuerdu cola medría del programa a nivel estatal, que pasa de 45 a 100 millones.

Amás d'esta medría, incluye estes novedaes:

- El plazu de presentación va ser d'un añu de magar se publique la convocatoria.
- L'achatarramientu d'un vehículu vieyu yá nun va ser obligatoria, aunque se si lleva a cabu l'ayuda pa la compra d'un nuevu va ser mayor.
- Énte la demanda xenerada, amplíase'l presupuestu máximu que pue dedicase a vehículos pesaos de gas.
- Cola mira d'incentivar la sustitución del parque móvil por vehículos sostenibles, nun va haber qu'esperar a la publicación de la convocatoria de les ayudes pa tramitar la solicitú. Quier dicise, que va poder adquirise un vehículu eléctricu, híbridu, propulsáu por gas natural licuao (GNL) o hidróxenu, y solicitar depués l'ayuda.

El Principáu va dedicar la mayor parte del presupuestu a promover la compra de vehículos de combustible alternativo y va intentase que la mayor parte de les ayudes puedan concedese esti mesmu añu. Les subvenciones varien a tenor de la motorización y categoría del vehículu:

- Dende 600 euros pa cuadríciclos llixeros eléctricos hasta 15.000 pa la compra de camiones y autobuses eléctricos.



- La subvención pa la compra de turismos eléctricos puen llegar hasta los 5.500 euros (con achatarramientu) y inclusive hasta los 6.000 (tamién con achatarramientu) nel casu de vehículos comerciales d'hasta 3.500 quilogramos.
- Pa la instalación de puntos de recarga eléctrica, les ayudes van ser del 30 % o'l 40 % del costu subvencionable, según la clas de beneficiariu, con un tope de 100.000 euros.

Asturies ye líder nacional en movilidad eléctrica: la primer comunidá en númeru de puntos de recarga, la quinta en penetración de vehículos d'estes característiques y la primera en carga rápida. Amás, la primer convocatoria del Moves recibió una gran acoyida y dexó executar tol presupuestu.

### **Refuerzu de les polítiques d'igualdá y contra la violencia de xéneru**

L'Executivu autorizó la suscripción de 16 convenios de collaboración con otros tantos conceyos y mancomunidaes, dotaos en total con 1.101.535,5 euros pal caltenimientu y xestión de la rede de centros asesores de la muyer.

Estos alcuerdos dexen destinar una subvención individual de 78.681 euros a los conceyos d'Uviéu, Xixón, Llangréu, Mieres, Valdés, Cangas del Narcea, Ayer, A Veiga, Llanes y Piloña y a les mancomunidades de la Comarca de la Sidra y de les Cinco Villes. Amás, los conceyos d'Avilés, Llaviana y Teberga van recibir una ayuda de 39.341 euros, mentes que la subvención de Siero va ser de 39.340,50 euros.

Estos centros ufierten asesoramientu xurídicu gratuitu, amás de dar asistencia especializada a muyeres víctimes de violencia machista.

El compromisu del Principáu coles polítiques d'igualdá y cola llucha contra la violencia de xéneru reflexóse tamién na renovación, en xunetu, de los convenios de collaboración con seis conceyos pal caltenimientu de la Rede de Cases d'Acoyida, que'l Gobiernu asturianu financia con más d'un millón. Tamién en xunetu, l'Executivu dio'l preste a la concesión de 149.527,56 euros n'ayudes directes a muyeres víctimes de violencia de xéneru amás d'a fíes y fíos de víctimes mortales por violencia de xéneru. Estos fondos enmárquense nes midíes integrales de proteccón, atención y asistencia a les víctimes amás d'a les sos fíes y fíos, y tán financiaes con cargu al Pactu d'Estáu contra la Violencia de Xéneru.

### **Obres de meyora del saniamientu**

El Gobiernu autorizó'l gastu y la contratación de trés obres de saniamientu y depuración d'agua nos conceyos de Llanes, Siero y Uviéu con una inversión global de 7.513.977 euros.

Estes actuaciones, incluyíes nel plan de contratación p'anguaño de la Xunta de Saniamientu del Principáu, organismu dependiente de la Consejería d'Alministración Autonómica, Mediu Ambiente y Cambéu Climáticu, son les siguientes:

- Valmori y Posada (Llanes)

Va acometese'l proyectu de colector d'incorporación del saniamientu de Valmori y Posada a la Estación Depuradora d'Agua Residual (EDAR) de San Xurde, en Llanes, con un plazu d'execución de 16 meses y una inversión plurianual de 2.293.184 euros. D'esta cantidá, 150.000 euros consígnense anguaño, 793.184 nel 2021 y 1.350.000 nel 2022. Les obres van consistir en conducir el vertíu d'agua residual de la población d'estos dos llugares a la EDAR de San Xurde coles mires d'optimizar la esplotación del sistema de depuración de la costa central de Llanes.

- Ríu Nora (Siero)

El proyectu d'ampliación de la capacidá del interceptor d'El Ríu Nora (Siero) cuenta con un presupuestu de 2.454.285 euros, de los que 300.000 van invertise anguaño, 954.285 nel 2021 y 1.200.000 nel 2022. Esta actuación, que tien un plazu d'execución de 24 meses, rique la meyora de les instalaciones de la Estación de Bombéu d'Agua Residual (EBAR) de Bergueres y doblar un tramu del colector interceptor del Nora, cola mira d'aumentar la so capacidá hidráulica, faciendo posible desaguar el caudal d'agua residual xenerao en La Pola.

- Polígonu del Espíritu Santu y La Venta'l Gallo (Uviéu y Siero)

La meyora de bombeos dende'l polígonu del Espíritu Santu y La Venta'l Gallo, nos conceyos d'Uviéu y Siero, respectivamente, va tener un costu de 2.767.544 euros. El proyectu incluye obres de meyora de les instalaciones nes respectives EBAR p'aumentar la so capacidá hidráulica, anovar equipos obsoletos, optimizar la esplotación y cumplir la normativa ambiental. El presupuestu de les obres, que tienen un plazu d'execución de 24 meses, pártese en trés anualidaes: 233.500 euros nel 2020, 907.544 nel 2021 y 1.626.500 nel 2022.

Toles actuaciones tán cofinanciaes pol Fondu Européu de Desenvolvimientu Rexonal (Feder).



### Convenios n'ámbitu educativu

L'Executivu autorizó la celebración de dos convenios pola Consejería d'Educación, el primeru d'ellos, col Ministeriu d'Educación y Formación Profesional, dirixíu a promocionar el pensamientu computacional en toles etapes educatives non universitaries al traviés del proyectu *Escuela de pensamientu computacional y intelixencia artificial* (Epcia), que coordina l'Institutu Nacional de Tecnoloxíes Educatives y Formación del Profesoráu (Intef).

El segundu de los convenios, col Institutu d'Evaluación y Asesoramientu Educativu (IDEA), de la Fundación Santa María (FSM), va dexar conocer l'impactu que'l confinamientu pola pandemia tuvo tanto nel alumnáu como nel profesoráu. Con eso búscase orientar les respuestes de les autoridaes y de los centros con una ufierta educativa de calidá, afecha a les circunstancies d'educadores y educandos.